

# «Quai dà schlantsch per cuntinuar»

Premi pella Chüra d'uffants Engiadina Bassa

**Al di da l'uffant ha surdat la Fundaziun Pestalozzi a la società Chüra d'uffants Engiadina Bassa ün premi dotà cun 20 000 francs. Il premi onurescha las staintas da quista società pella promoziun d'uffants pitschens.**

La Fundaziun Pestalozzi vuol cuntinuar a promover la qualità da la fuormaziun e scolaziun in Svizra. Ün böt es eir da ragiundscher l'egualità da las schanzas da glieud giuvna in regiuns muntagnardas e periferas. La fundaziun vain sustgnüda eir da l'organisaziun da tet da la magistraglia svizra, la LCH. In stretta collavuraziun ha ella lantschà ingon pella prüma jada l'uschenomnä «Frühförderungspreis für Schweizer Berggebiete.» Passa 20 instituziuns chi promovuan uffants pitschens da tuot las quatter regiuns linguisticas da la Svizra s'han annunzchadas.

## Duos nominaziuns grischunas

Il grond eco muossa a l'avis dals respunsabels da la Fundaziun Pestalozzi chi'd es gnü prestà illas regiuns muntagnardas grazcha a l'ingeschamaint voluntari fingià blera lavur pioniera. Chi exista però istess amo il bsögn per ulteriuras sportas, disch Erika Andrea, la manadra da gestiun da la Fundaziun Pestalozzi cun centrala a Turich. Ella es da lingua rumantscha, ed oriunda da la Val Schons. «Nos premi dess esser ün stimol per s-chaffir novas sportas pella promoziun d'uffants pitschens. Grazcha a las instituziuns complementaras a la famiglia han ils uffants güst in regiuns turisticas eir da differentas linguas megldras premissas per cumanzar lura la scouline e davo la scoula primara.»

Sco ch'ella infuormescha, exista la Fundaziun Pestalozzi daspö l'on 1961 ed ha sustgnü cun contribuziuns e stipendis fin uossa var 6200 giuvnas e giu-



Fadi Mosca illa canorta da Scuol cun Mia (schnestra) ed Andrea chi valvan eir plaschair da gnir fotografats.

fotografia: Flurin Andry

vens cun ün import da passa 37 milliuns francs. Ultra da la Chüra d'uffants Engiadina Bassa d'eiran gnüts in stretta tschera il proget «Integration im Frühbereich» da las manadras da gruppas da gö glarunaisas e'l Gruppo di gioco «Pinguin» da Brusio.

## «Società sco bun exaimpel»

La giuria ha tschernü la società Chüra d'uffants Engiadina Bassa, causa ch'ella saja ün fich bun exaimpel «per ün model da chüra d'uffants pitschens.» La società es gnüda fundada da l'on

2001. L'intent d'eira da dar a mammas da famiglias cun ün pitschen guadogn, a mammas chi ston educar be sulettas o chi vöglian restar activas illa vita professiunala, la pussibilità da laschar chürrar lur uffants da personas fidadas. «Quai fa la società cun mammas da di, cun famiglias grondas a Zereze ed Ardez e daspö utuon 2010 eir culla canorta a Scuol», disch il president Fadi Mosca. In tuot pon profiter actualmaing 73 uffants da quistas trais sportas. La manadra da la canorta es Gabriella Greiser da Guarda e la re-

spunsabla pellas famiglias da di es Yolanda Ellemunter da Scuol.

Cha las commembras e commemorers da la società undrada hajan grond plaschair dal premi, s'allegra Fadi Mosca, «nus eschan eir ün pa superbis dad esser gnüts tschernüts, quai muossa cha nus eschan sülla dretta via e quist premi dà eir schlantsch da cuntinuar nossa lavur.»

## «Promoziun dal rumauntsch»

Sco cha'l president Fadi Mosca disch, ha la Chüra d'uffants regionala plüs

böts: «Ella dess esser üna buna sporta da chüra chi'd es adattada per mincha famglia, il prüm vegna perquai examinà che chi'd es l'optimal pellas singulas famiglias.» Cha la società metta però eir pais d'avair üna chüra professiunala chi fa la lavur cun bler plaschair ed amur, cuntinuescha'l e manzuna cha la lingua rumantscha gnüa promovüda. «Nossa sporta güda implü eir ad integrar a las famiglias chi vegnan ad abitar illa regiun illa vita sociala dals singuls cumüns», constata Fadi Mosca. (anr/fa)